

Menjelang aksi separuh akhir pertama hoki Piala TNB 2013

Sapura selesa dilabel *underdog*

Oleh NOR AZIRAN YUNUS
aziran.yunus@kosmo.com.my

SAPURA lebih selesa sekiranya mereka dilabel sebagai pasukan *underdog* pada aksi separuh akhir pertama kejohanan hoki Piala Tenaga Nasional Berhad (Piala TNB) 2013 menentang Kelab Hoki Kuala Lumpur (KLHC) di Stadium Hoki Nasional, Bukit Jalil esok.

Jurulatih Sapura, Tai Beng Hai berkata, beliau sedar pasukannya bakal berdepan halangan besar pada aksi menentang sebuah kelab gergasi seperti KLHC.

"Saya berharap pemain akan turun ke padang dengan penuh semangat dan bermain seperti biasa tanpa sebarang tekanan.

"Saya juga selesa Sapura dianggap pasukan bukan pilihan kerana saya tidak mahu ia mengganggu tumpuan pemain-pemain saya," kata Beng Hai kepada *Kosmo!* kelmarin.

Dalam pada itu, pengendali KLHC, K. Dharmaraj berkata, beliau tidak pernah menganggap KLHC sebagai sebuah pasukan yang hebat selagi mereka tidak menjulang Piala TNB tahun ini.

"Agak berat bebanan yang kami pikul apabila disebut-sebut sebagai

pasukan pilihan dan terbaik, namun itu saya anggap hanya sebagai satu tonik tambahan buat kami untuk lebih berjaya selepas ini.

"Pada sesi latihan sebelum ini saya meminta pemain-pemain saya untuk mengasah ketajaman penyudahan mereka kerana perkara itu dilihat masih menjadi halangan buat kami setakat ini," kata Dharmaraj.

Sementara itu, ketua pasukan KLHC, Muhammad Razie Abdul Rahim berkata, Sapura merupakan salah sebuah kelab terbaik di negara ini dan kekuatan mereka adalah menerusi pukulan sudut penalti.

"Kami telah mengkaji corak permainan Sapura menerusi rakaman video dan kami akan memperbaiki setiap kelemahan kami.

"Saya dan rakan-rakan sepasukan sudah bersedia untuk aksi separuh akhir itu nanti dan kami akan melakukan yang terbaik bagi memastikan KLHC muncul juara berganda sekali lagi musim ini," kata pelajar tahun akhir di Universiti Putra Malaysia (UPM) itu.

Esok, KLHC bakal menentang Sapura (6 petang) manakala Maybank bertemu TNB pada pukul 8 malam di Bukit Jalil.



PENYERANG import Sapura, Khasif Ali dari Pakistan muncul penjarang terbanyak Liga Hoki Malaysia 2013 selepas meledakkan 17 gol setakat ini.

PIALA TNB

JADUAL PERLAWANAN
SEPARUH AKHIR PERTAMA  TENAGA
NASIONAL BERHAD

ESOK

PIALA TNB

KLHC

lwn

Sapura

Stadium Hoki Nasional, Bukit Jalil, 6 petang

TNB

lwn

Maybank

Stadium Hoki Nasional, Bukit Jalil, 8 malam

PIALA PRESIDEN

UiTM

lwn

Sunday 20/30

Stadium Hoki Nasional, Bukit Jalil, 6 petang

MBI

lwn

TNB Thunderbolts

Stadium Hoki Nasional, Bukit Jalil, 8 malam